

## Su Sulat ni Pablo dini FILEMON

Naa kini si Filemon, mabu' iini megdedengeg sakup ni Kristu tug lunsud Colosas begudiin, timpu pa ni nga Pablo. Si Filemon, duuni gulipenen, ngalanen si Onesimo, laak mike-laguy si Onesimo di kaulipen diniin ni nga Filemon. Naa si Onesimo kini, su saanan ni Pablo mpirisu, milabeten dayun si Pablo ditu pirusuan. Dayun pibian dini Pablo, suminakup dadema dini Kristu si Onesimo. Di sinulat kini ni Pablo, minengi si Pablo dini Filemon pu' dedialanen puli' sug daansama' gulipenen si Onesimo, laak dagid kana' na laak gulipenen, segaga pemi-langenan na samasakupen dini Kristu mimated na diniin. Su ngalan "Onesimo," gulugananen di pikebitan nilan begudiin, "duuni gatagen."

<sup>1</sup> Dini'a Filemon,

Naa naan si Pablo, mipirisu mau saba' nu kekpetuudu dini Kristu Isus. Sug dumau si Timoteo, mimated dinita.

Piwitan ka nami sulat, ya'a petailen sambat nami muka' limbang nami megukit Gempia Petenday. <sup>2</sup> Piwitan nami dadema su pikumpungan nu nga sakup ni Kristu diag balay mu, sampay su mimated dinita si Apia, muka' si Arquipo, duma ta dadema megukit Gempia Petenday.

<sup>3</sup> Penenebiin ku tu Gama' ta Megbebaya' muka' tu Kaunutan ta si Isukristu, begayan amu niin tulung muka' pianan ginaa.

*Su Kepetail ni Filemon muka' su Kekpetuuden*

<sup>4</sup> Naa Filemon, kada kenenabiu mekatag dini'a, mekpaladpaladu tu Megbebaya', su pektemuyen ku. <sup>5</sup> Pu' miukit na dinaan ki kepetail mu tu kelaun piglegetawan nu Megbebaya' muka' su kesalig mu tu Kaunutan si Isus. <sup>6</sup> Iini penenebiin ku puun tu keksalabuuk ta di kekpetuud ta, megisegi kesabut ta di kelaun kepepia dinita ni Kristu, miksekat di keksalabuuk ta diniin. <sup>7</sup> Pu' petailen ku mimated, liliagu gupia ditu kepetail mu tu samasakup mu, miamu'u dun gupia. Pu' su kelaun piglegetawan nu Megbebaya', pinleliag puun dini'a.

*Pinengian Lelaat si Onesimo*

<sup>8</sup> Naa ma'antu, kagina samasakup ita ni Kristu, duuni pegbaya'u sumugu'u sia dini'a di gempia mu baalen. <sup>9</sup> Laak pia ma'antu, kana' sugu' ini, pu' menengiu laak dini'a, puun tu kekpinetailay ta nga sakup, asa naan si Pablo pigwekilan ni Kristu Isus, muka' mipirisu dau dema nemun saba' nu kekpetuudu diniin. <sup>10</sup> Kaas, penengiin ku laak dini'a, kini si Onesimo, lepeng bata'u di keksalabuuk ta dini Kristu, sa' mesu'at lelaatay mu iin. Pu' si Onesimo kini, su saanan ku dini pirusuan, inukitan ku Gempia Petenday, kaas suminakup. <sup>11</sup> Naa metuud, begudiin nda'i gatagen dini'a. Laak nemun, gembageli gabangen dini'a, gembagel dademai gabangen dinaan.

<sup>12</sup> Mendadi iin, su petailen ku gupia, pauli'en ku na dini'a. <sup>13</sup> Mauya'an ku sia, sumala pa dini naan megbenwa, adun iini gumanti' dini'a megabang dinaan selian ku mpirisu saba' nu

kegukitu tu Gempia Petenday. <sup>14</sup> Laak ndi'u ya'a tegelen di gempia mu baalen, pu' iin sungkini mauya'an ku, sengu'en mu tu'u su penengiin ku dini'a puun tu gempia delendeman mu, kana' puun tu tegel. Kaas pegelatan ku pai sembag mu.

<sup>15</sup> Pu' si Onesimo, mabu' iini misuay dun dini'a nda' maiben, pu' adun mekepuli' pelum dini'a, dayun ndi' na mekpesuay dini'a. <sup>16</sup> Pu' nemun, kana' mu na sesugu'en laak iin, pu' petailen dadema mimated dini'a puun tu kesakup niu dua' dini Kristu. Naan, petailen ku gupia iin, labi pa mbantang petailen mu nemun, kana' laak sesugu'en mu pu' samasakup mu dadema ditu Kaunutan ta!

<sup>17</sup> Kaas sa' pemilangen mau tantu limbang mu miksekat di kekpetuud ta, su kenemba' mu diniin, pelepeng mu tu kenemba' mu dinaan.

<sup>18</sup> Sa' duun pa pagidi sala'en dini'a atawaka gutangen, delendem mu danaan sala' muka' danaan gutang. <sup>19</sup> Pirmaan ku ini, naan si Pablo, biadan ku dini'a. (Asa nda'u tegyung dini'a pu' duun dadema siai gutang mu dinaan. Pu' kana' ba naani migukit dini'a adun mialap mu na su ketubu' nda'i tamanen?) <sup>20</sup> Kaas, Mingumpated, kelelaat dini'a, begay mu dinaan ki penengiin ku kini dini'a mekatag dini Onesimo, puun tu kesakup mu tu Kaunutan ta. Pu' sa' begay mu, leliagenu dun dayun, pu' mikpated ita di keksalabuuk ta dini Kristu!

<sup>21</sup> Naa suminulatu dini'a, pu' misuunan ku ki penengiin ku dini'a kini, petuuden mu, kampu' nu nda'u mpeksaak dini'a. <sup>22</sup> Muka' padun, pengendamay mau sugudu ditug balay mu, pu'

pedetengen ku mekepuli'u diniu, puun dadema tu kenenabi niu, launan niu.

*Katapusan Pemuun*

<sup>23</sup> Naa si Epafra, dumau mipirisu saba' nu kekpetuud ta dini Kristu Isus, mipenambaya niin, <sup>24</sup> sampay si Marcos, si Aristarco, si Demas muka' si Lucas, ngag dumau dini megukit tu Gempia Petenday.

<sup>25</sup> Naa penenebiin ku tu Kaunutan si Isukristu, begayan amu niin tulungen, launan niu.

Daal daitu.

*Pablo*

**Kig Begu Pasad: Ki talu' nug megbebaya'  
(Bagong Tipan: Maayong balita alang  
kanimo)**

**Subanen, Central: Kig Begu Pasad: Ki talu' nug  
megbebaya' (Bagong Tipan: Maayong balita alang  
kanimo) New Testament**

copyright © 1993 Wycliffe Bible Translators, Inc.

Language: Central Subanen

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 22 Feb 2024 from source  
files dated 29 Jan 2022

e39efc58-c45f-53c6-990e-d3cd833e20b4